

四庫全書

集部

欽定四庫全書

集部

張文貞集卷十

詳校官起居注事

臣顧宗泰

助教

臣

常循履勘

總校官進士

臣朱

鈐

校對官修撰

臣吳錫齡

謄錄監生

臣徐步青

欽定四庫全書

張文貞集卷十

大學士張玉書撰

誥授光祿大夫勇略將軍提督雲貴兵部尚書兼都

察院右副都御史世襲一等精奇尼哈番諡襄

忠趙公墓誌銘

康熙三十八年三月四日光祿大夫勇略將軍

趙公以疾薨于寧夏里第時

車駕方西征聞奏震悼比從橫城口濟河下

諭內閣部院諸臣勇畧將軍趙良棟為國家宣力奮
庸厥功甚茂倏以疾逝朕深憫焉茲師抵朔方
道經其門欲令皇子臨視奠醊可集議以聞于
是_臣玉書偕諸臣言

皇子親臨臣下之喪曠代希有將軍臣良棟膺茲異
數豈獨一家之私榮凡百臣工無不感激隕涕
明日次寧夏

皇子臨喪舉哀賜奠如禮閏月復頒

諭祭文遣大臣致祭其子道

臣

宏燮中書

臣

宏煜先

後詣

行在謝

恩

上皆召見撫慰之又數月允禮臣請以例子祭葬賜

諡襄忠嗣摠戎宏燦歸自黃巖乃卜冬十二月

日葬公于城西二十里某原而乞銘墓石于余

余辱交公久素悉公歷官制軍忠勇大節與其生平慷慨質直強毅不撓之氣嘗私竊嘆羨以
以為古名將所不及而

聖天子推心置腹眷倚之重以及自始迄終恩禮之隆尤足以獎勵功勲為勞臣白首効忠者之勸余雖不敏敢不據所見聞撫拾其梗概而叙次之公字擎之號西華先世自陝西綏德衛遷居安邊逮公官寧夏因家焉故今為寧夏鎮人曾

祖某祖某父某官海州參將皆贈如公官曾
祖妣某氏祖妣某氏妣某氏皆贈一品夫人
公少工舉子業顧倜儻有大志不屑束縛章
句遂杖策從戎順治二年隨和碩英親王師
入關中受知于制府孟公喬芳署潼關守備從
征賀珍武大定等賊又從定寧夏叛兵之變因
署其地屯田水利都司四年領兵平河西回亂
又單騎擒肅州偽總兵丁國棟擢補高臺遊擊

十三年

王師入滇以雲貴督標副將從征隴納諸苗康熙元年積功授都督僉事充雲南廣羅總兵官是時吳三桂專制滇南所補官吏

詔部臣不得掣肘于是三桂調公貴州比喇鎮令進勦水西公方丁外艱力辭不許四年水西平乃聽終制三桂中藏叵測以牢籠人才為務惟公先幾之哲不為所用云八年補大同加左都督

十一年調天津明年冬滇逆變作四方叛賊蜂起寧夏亂兵劫殺其主帥勢甚猖獗十五年春特命公提督寧夏馳傳往鎮撫之公見

上詞氣激慷請移家口居京師得一意辦賊上壯其言隨

命賜第公至鎮集將佐宣布德意捕斬首亂四人餘不問邊境遂安公駐朔方四載念關中粗定而漢南巴蜀猶阻聲教自請率部卒五千獨當一

路進取漢興恢復蜀地

詔下軍前諸大臣集議僉言大軍宜分興安棧道入
堵山小川子四路並進需兵五萬人公曰兵貴精
不貴多也自將五千人指八堵山徑入十月破密
樹關取徽州復略陽分遣裨將趨陽平關覘賊
虛實仍條上調兵運餉事宜請兩路收川報可
特授公勇畧將軍十九年正月朔公師臨白水壩與
賊夾江而陣江流湍湧無舟楫將士有難色公

怒誓於軍曰視我馬策所指敢後者斬擐甲躍
馬浮江而渡一軍皆渡賊駭愕奔潰追擊之于
青山石硤溝歷舊州明月江屢戰捷甫十日遂
抵成都先鋒奪門入公下令毋剽掠整軍登陴市
肆晏如在城偽官及逆兵數千人疑懼不自安公
悉以迎降奏釋衆皆感悅越數日奮威將軍王
公進寶亦報保寧之捷東西川以次收復事聞
天子降溫旨勞軍以

御書題額及弓矢橐鞬名馬之屬先後頒賜甚渥是時湖南粵西方併力進師規取雲南

上念巖疆綏靖制府需人非得謀勇素著操履潔清
兼資文武大畧者不克勝任遂授公兵部尚書
兼都察院副都御史總督雲貴將軍如故而以
公之子宏燦為寧夏總兵官隨軍進勦自收蜀
以後苞蘄尚繁公經營一載反側者始定二十年
三月追勦逆渠胡國柱于觀音巖十丈孔五月破

關山象嶺渡瀘江七月復取建昌乘勝渡金沙
江九月乃入滇時楚粵之兵已圍滇省城數月
顧持久不能拔公周視壁壘謂結營遼遠賊得
番息法當移軍逼之選入川精銳五千親冒矢
石取玉皇閣進逼新橋賊方據橋扼守復以計從
上流濟師晝夜力攻凡八日而城下逆賊踞滇
日久私歛充物一時諸將雲集多志在攘掠惟
公飭所部卒勿以一騎入城既奏凱即懇請陞

見移師曲靖以待命嗣後黷貨者累累致敗而公獨
皦然無滓其遠識確守卓然有古大臣風烈焉
公于時已年踰六十

上念公久勞於外特允入朝二十一年冬授鑾儀衛
使踰年請疾歸里二十七年以

國恤會葬詣

闕下三十年厄魯特噶爾丹蠢動邊塞大軍駐朔
方

詔公以在籍老臣預議軍事三十三年禁旅出塞公偕行指畫地勢兼以私財佐軍既還復

詔入朝明年追論前功特加一等精奇尼哈番世襲是年秋就醫江南

賜御舟給驛三十五年復

召入朝時

上決策統師北征諮邊事甚悉公因疾不果從比及師旋遂

賜歸明年西征

上方欲就詢公于里第而公竟不及待嗚呼是可悲也公結髮事戎行五十餘年大小戰數百未嘗敗衄御下嚴而有恩觸法者雖小必罰有才畧堪任者抗疏引薦常自偏裨積至大帥軍中甘苦與共一飲食不以自私入蜀之後裹糧涉險轉戰七千餘里而士卒咸樂為盡死無一怨言其能結士心如此故所向有功性伉直同事多

不相下功成以後巷間者日衆惟

上知公深嘗格衆議曲賜維護自蕩平三逆以來閱
十五年矣復厯

詔旨鋪陳本末於平蜀嘉倡進之謀於克滇獎廉潔
之操于是公之勞績久而益明而其行履卓犖
無疵亦得較然備著于

國史是公之得全其身與得全其名皆

上恩也百世而下聞之猶為感奮太息而況于公乎

而況公之子若孫乎是用脩書以示來裔公生于明天啟元年十月距薨得年七十有七配郭氏繼配李氏白氏贈封俱一品夫人子五人長宏燦以左都督充浙江黃巖等處總兵官次宏燮御史宏煜內閣中書宏煒宏禧尚幼女三人長適庚子舉人強振猷次適候推副將郁起雋次適一等侯江南提督張雲翼孫六人公治家如治軍閨門嚴肅儼若公府諸子屏息侍立無

敢有跛倚之容以是總戎憲副所至有政聲中
書君亦明敏練達皆仰荷

宸眷云銘曰天翊

景運篤生人傑桓桓趙公威武維烈早歲杖策從
王于征手執螯弧目無堅城爰制中權爰總戎
律嚴明有威卒伍整密三秦叛亂將驕卒狂風
馳颶驅迅掃欃槍巴蜀如焚滇黔如悞獨提孤
軍鼓行而南銜枚宵濟莫敢齟齬直入蜀郭前

歌後舞蠶叢既定揚旌渡瀘環城三匝拉朽摧
枯賊首朝授降幡夜豎氛祲盪滌復我疆土凡
此大功

帝曰爾庸事紀簡冊銘勒鼎鐘大官授膳尚衣賜服
彤弓盧矢驂駟驪騮公之來朝

天子燕喜公之既歸

天子拊髀國有大事爰詢爰謀公徐一言等于圖球
公之材武如羆如虎公之智畧如風如雨公之

精誠如火弗滅公之勁直如鐵靡折持其孤忠
以報

一人白首不挫厥聲斷斷惟

天子明獎乃勲勞生有殊恩歿有厚褒以勞定

國以死勤事

主聖臣忠近古莫二歷觀載籍如公不朽納銘幽宮
垂示永久

秦海翁墓誌銘

梁溪秦海翁先生以孝友篤行爲東南人倫模楷者五十餘年年八十有五無疾而逝子孫曾玄環哭於帷堂內外者凡九十有六人以人世壽考福澤而論可不謂極盛矣乎長公宮諭對巖先生出嗣降服而創痛益深既持服之三月將偕諸弟奉喪葬唐灣山之新阡而告期于余且屬爲銘余惟過時不能葬與不及時而渴葬皆公羊之所譏也三月而襄事必誠必信勿之

有悔宮諭深于禮矣余於宮諭稱詞林後進而
先生又素所仰止銘奚敢辭按狀先生諱德藻
字以新海翁其號也系出宋淮海太虛公之後
太虛子湛為常州倅因家於常閱十傳而徙無
錫之胡埭遂為無錫人入明累葉通顯嘉靖癸
丑進士巡撫湖廣右副都御史諱耀為曾祖考
太學生諱仲錫則顯考也妣金壇于孺人褒甫
公之女子三人先生居次生而孝友天植髫年

侍父疾即能盡抑搔扶掖之節父歿祖父母在堂拭涕問寢退至苫次則兄弟相向痛哭以為常及執祖父母喪泣血居廬與三年喪等曰吾以終父志也事伯叔父如父叔父之齒少于先生二十歲側行却立白首不渝伯兄歿無子應宮諭為後先生不欲獨有兄產遂以季弟之子並嗣族黨稱焉淮海公祠歲時薦享先生主之至日少長畢會隱然寓睦宗收族之義挺秀堂

者十世相傳之居也一夕燬于火先生傾困粟以
鼎新之寄暢園為中丞舊築海內所稱秦園者
也歲久蕪廢且割為僧舍先生獨力修復悉還
舊觀其他累世遺構皆次第完葺以無墮先人
之業此先生繼述之大節也素性和易不樂聞
人過邑有胥吏以僉役累先生事覺坐杖先生
召其人予之金以慰之宮諭之被誣誤也族姑居
他邑詭寄戶籍而有逋賦遂波及焉先生恐罪連

姑之幼子竟不置辨以是宮諭沉淪林泉者十有餘年其遇人篤厚有思如此甲寅以後宮諭奉

詔贊楚軍會廷舉博學復入翰苑直

講筵比歲歸里先生顧而色喜曰吾老矣願諸子之
皆侍側也平生故交則錢十峯張孤川為道義
性命之友縱論經史觴詠不輟一時推為耆英
車駕巡江南幸寄暢園者凡四先生率子姓伏謁道左
上親問年齒注視久之已卯夏復即園中

御書二額以賜遭遇之隆士大夫所罕覲也夫世際

休明

聖天子就問高年優禮耆碩所以維風教之意甚厚
如先生內行淳備息深而視下或僅視為一門
聚順及為善鄉井之常不知抑詩有言夙興夜
寐灑掃庭內初無高世絕俗之事而武公之稱
睿聖以此則先生之孝友篤行卓然為人心風
俗所繫不亦至明且著矣乎先生生萬厯丁巳

二月四日由明經封文林郎翰林院庶吉士卒
以

皇清康熙辛巳五月七日葬以是年八月下澣六日
啓元配侯孺人兆合焉孺人為明戶部主事澹
泉公女室中雷災曾手舁翁柩以脫於火人稱
為孝婦子五人長即宮諭松齡順治乙未進士
歷官

日講官起居注左春坊諭德兼翰林院修撰出繼贈

庶吉士以時君後次松期歲貢生蒙城縣訓導
改翰林院孔目松喬松如松虬俱例監生松如
任廣東吳川縣知縣松虬前卒女四人一適國
學生侯麟然餘俱殤孫二十三人松齡出者六
松期出者五松喬出者三松如出者五松虬出
者四孫女十六人曾孫二十六人曾孫女二十
五人玄孫一人玄孫女二人婚娶皆名族銘曰
吁嗟先生秉質清淑道勝而腴貌恭而肅堂構

師儉閨門敦睦喬木十圍藏書百軸

天光下臨旁燭巖谷煌煌賜額寵踰車服先生之孝
倣古收族先生之澤貽有穀存順歿寧幽窆
是卜我勒銘詩龍灣之麓

誥授光祿大夫巡撫江西都察院右副都御史馬
公墓誌銘

公姓馮氏諱如龍字見五其先河南人明洪武
中有以軍功衛延安者子孫家焉故今為陝西

綏德州人曾祖某祖某父某皆以公貴贈如公
官曾祖妣陳氏祖妣劉氏任氏妣某氏皆贈一
品夫人公生而孤育於伯父光稷事伯父如父
於兄弟友愛備至讀書不事章句慷慨有大畧
方貧約時于榆林道中得遺金百兩義不忍取
俟其主至悉付之歲壬子舉于鄉出葉忠節公
之門時逆藩煽亂餘黨蔓延于綏賊朱龍將寇
城城中恟懼公授兵登陴援桴誓衆及

朝廷命大師至為設攻守方畧城賴以完王者嘉其功事聞即命公守綏公以桑梓固辭而才名蔚起未幾改守灤州灤俗悍而多盜旗弁債帥持吏短長公鋤奸蘇良豪右斂手州有民殺人而埋其屍四十餘年矣公一夕宿逆旅恍惚有人訴冤掘其地得白骨詢之土人云此屋已十易主窮詰最初一人遂吐實立寘于法昌平衛民有父子被殺者莫知主名郡守以公材使治

之公于道逢白馬少年云殺人者叔也公至其地詢民旁有張劉二姓張即其子之中表叔也訊之不承令私跡之二人相語曰誰謂馬公察者易欺耳即執之一訊而服於是數州之民皆頌公以為神陞戶部江西司員外郎轉刑部山東司郎中時蔚州魏公為司寇真定梁公為司農而公與于清端公相善且聲望相埒也故二公深器之以薦權北新關洗手將事宿弊盡革

秩將滿會天大寒公下令弛關禁譏察之外不收錙銖于是商民往來無稅者一月謳吟之聲徹于南北事竣擢杭州知府其治如治灤而加惠焉杭民稱貸于軍營期滿不能償則以子女為質因沒入之公白于將軍請核其子母虛實令悉持券來官為代償一日盡給之無留者軍得實惠而民免驅迫之苦至今尸祝焉歲在己巳

六飛南巡供張儲侍應時立辦民不知擾

天子知公廉且材以為可大用也即超拜浙江按察使公奉

命感激竭力稱報平反庶獄多所全活海寇潘三者假貿易聯絡隣境欲謀不逞公密偵得實白制府設策擒之殲其首從六人牽連者七十餘人赦不問西興渡船貪利重載遇風多溺死公立禁船無過三十人違者罰無赦至今錢塘江無

漂沒者其仁而有威皆此類也踰年進本省市
政使

命下之日民大欣悅當是時今總河遂寧張公實為
巡撫公自益剴厲故事屬吏有歲餽公悉禁絕
之康熙二十九年紹興大水公私赤立莫可存
濟公檄十一郡合輸米二萬餘石按戶賑給曰
是踰于歲餽多矣蓋公仁心為質知所緩急輕
重期以權宜活民而非於已有毫髮私也于是

公政績日著

天子特簡公都察院右副都御史巡撫江西公既至
時其柔剛與民休息仿白鹿洞遺法建書院以
教士之秀者嚴溺女之禁分給常平倉羨米以
使無告者有所養雪廬山白石庵僧冤獄脫無
辜者三命再疏請罷追轉漕脚耗永甦官民之
困暮年以後人安吏輯環數千里之境皆曰我
公以嚴明廉幹聞天下今優游無為不動聲色

而事以大治洵乎一張一弛公之才無施而不
可也已卯春

車駕以視河南巡既還公奉

詔陞見

上獎勞再三

御書老成清望堂額以寵其歸時淮揚荐饑

上命公設法救濟公以西江連歲豐穰救災恤隣道
也遂倡僚屬捐米十萬移賑之淮揚之民戴

上之仁食公之賜歌詠功德溢于三吳公之拊循愛
養以其餘及於隣封又如此方公之守杭也以
爭寃獄與當事有隙後其人倉卒遇事舉重貲
託公及事定還之封識宛然其人媿謝欲以千
金為壽不屑也其始至江西也屬吏有不飭者
將按之誓潔已自効及公陞見其人縱恣如故
公再至復自戢蓋公之生平廉以律已而寬于
責人急于豪強而緩于小弱故自起書生至東

節鉞所在有聲蹟又能以功名終皆以此也公性澹泊無聲色之好祿入所餘周及三黨州之文廟圯興修之役獨力任之平居好獎人之善門生故吏成就者衆公所推轂後多為顯人居江西屢疏乞罷

俞旨慰留康熙四十年辛巳十二月以疾卒于官壽七十有五夫人劉氏贈一品夫人繼配劉氏封一品夫人子二益丙子科舉人豫庚辰科進士女五

人孫男二人國鑑國鎮俱太學生孫女一人婚
嫁皆世族孝廉兄弟將以四十一年六月葬公
于某鄉某原屬京兆錢公問銘於余往余在班
行接公言論風采嘗嘆為偉人後奉使至杭握
手於舟中具悉治杭之政比扈

蹕再至復見公及公鎮撫西江而不相見者十餘年
矣前年公入朝余方在丙舍聞精力甚健今余
甫入

國門而忽承公訃且執筆以志墓石能無慨焉三嘆
矣乎公生平行誼政績不可縷指謹揭其大者
書之遂為之銘銘曰竭竭馬公發跡武功式遏

寇亂

帝嘉其忠威能行仁廉以生明摘奸糾伏其頌如神
在越十年不名一錢蘇商惠民利及舟船西江
之政以時弛張恩隨波流長淮湯湯公之來
朝錫賚孔多公之歸矣人用浹和老成清望大哉

王言生榮死哀作則于垣維公初終功在民社我作
銘詩告後來者

予告光祿大夫少傅兼太子太傅保和殿大學士兼
禮部尚書諡文靖王公墓誌銘

宛平王公在政府二十年而予告又二年而薨
於里第時

車駕方南巡聞訃震悼命賜卹如制及還京

詔

皇子率大學士馬公偕禁近諸臣臨公喪且奉

諭旨王行三叩禮舉哀奠醑不循常格蓋自四十餘
年以來

世祖章皇帝舊臣先後徂謝惟愬遺公之一老

皇上篤念老成耆德故恩禮獨厚於是玉書偕同官

及九卿大僚合詞陳謝而一時在廷諸臣及閭
巷聚觀者無不歎歔感誦至於泣下比閤中擬
謚上請

特予文靖諡法寬樂令終曰靖本朝未有諡者亦可
謂象公惟肖矣公幼穎異成童時即舉四書孝
經疑義質問於塾師年十九舉順治三年丙戌
鄉試明年成進士改庶吉士授檢討翰林官兼
習滿書者多不能精詣與竇公天資高踰年而
學成

世祖屢試稱最隨陞國子監司業未幾進左春坊中允
纂脩順治大訓十一年進司經局洗馬

召入南苑校譯大學衍義及勸善書十二年進右春
坊諭德明年初開講筵充日講官進左庶子每
日直講命坐十四年春進宏文院侍講學士充
經筵講官尋進宏文院學士時文貞公方任國
史院學士

世祖諭曰父子同官古今所少以爾誠恪特加此
恩明年主武會試調翰林院掌院學士兼
禮部侍郎十六年教習戊戌己亥兩科庶

吉士十七年考滿加禮部尚書文貞公方長
禮部父子同部尚書海內以為榮十八年元

日

世祖不豫公日請安於

御榻前初六日漏三下

召入養心殿

諭曰朕勢將不起爾可詳聽朕命撰詔書公匍伏飲泣
筆不能下

世祖令抑悲痛即榻前起草公拭涕書一條進恐

聖躬過勞奏於乾清門下撰擬凡三次進呈至初七日

薄暮繕畢而

世祖即以是夜上賓公偕顧命諸大臣入哭一痛幾絕

至於面奉憑几之言有事關國家大計與諸大

臣再三密議而後決者公終身不以語人雖子

弟莫得而傳也十二月以尚書管禮部左侍郎

事康熙五年擢都察院左都御史公侃侃舉職

知無不言於時一歲賦入半耗于兵餉而雲南
閩廣三藩所駐之地尤甚公首陳裁兵節餉之
議謂滇黔業已蕩平兵額急宜汰減

詔下所司議省額餉百餘萬又言江楚諸路王公將
軍提鎮自置官商漁奪民利宜嚴飭禁革官吏
捐輸名出私橐實取自民間宜一切報罷招民
百家得授縣令不肖奸人往往借資為市宜改
給散秩凡所條上皆深得治體會天旱金星晝

見公言

先帝御極有年諸曹政務皆經斟酌盡善數年以來變易成憲者多矣法屢變則弊叢生今

皇上當勵精圖治之始法

祖所以敬

天請勅各衙門詳察見行事例有因變法而滋弊者悉遵舊制更正於是酌復數十事中外稱便七年進工部尚書督理宮殿大工屢著勞績十二年轉兵部尚書是年議

撤三藩十二月吳三桂反雲南日赴內廷議用
兵機宜十三年二月密疏請誅逆子應熊言逆
賊三桂負

國深恩肆虐滇黔流毒楚蜀散布偽劄煽惑人心
今大兵已抵荆南元憇旦夕授首獨是逆子應
熊素憑勢位黨羽衆多擅利散財蓄養亡命匪
類依附實繁有徒應熊既被羈守而流言繁興
訛傳不止奸謀百出未易周防大寇在外大惡

在內若不早斷恐滋後患請速正法傳首湖南
四川以寒老賊之膽以絕羣奸之望以激厲三
軍之心章下議政王貝勒大臣九卿科道會議
應熊旋伏法方滇黔之初告變也一夕京城內
外所在火起尋有偽朱三之獄捕繫數百人掠
治不得主名皆應熊及其黨惡為之三桂自恃
鳴張之勢又以其子方尚主朝廷必不殺以為
之招及應熊誅三桂驚悸發疾竟以是死人皆

韙公之能聲大義云十七年居文貞公憂二十
年服闋冬雲南平明年五月即家授保和殿大
學士兼禮部尚書於時逆氛初靖民生甫離兵
革公與勒公明公及李文勤公同在政府務以
和平寬大宣

上德意罷權宜之令停加征之額遵奉

詔書次第興革有應奏請舉行者悉陳於

上前無隱時玉書為學士親奉公教旨者一年至二

十九年公與伊文端阿文清及真定梁公在閣
玉書以後進入贊機務朝夕追從復八年有餘
中間合肥李文定亦共事二載一堂以內事應
商推悉心折衷始終無一疾言忤色有如昔人
所云推車子者故以玉書之謏陋亦幸獲無過
焉竊觀公立朝本末不沽名不市恩不植黨援
不持意見更事熟則於四方得失利病無不周
知歷諸曹久則於國家典制沿革無不洞悉每

論事闕廷指畫可否具有經緯聞者咸斂容欽服公博覽強記手點二十一史能隨事舉述大義而絕不以該洽自矜撰擬文字屬同官具藁點定一二字深中事理詩清麗不事藻縟闡明理學而亦不排擊二氏之教其造詣益宏且遠矣公素引嫌不欲與試事戊辰會試

特命為正考官取沈廷文等百五十人甚愜人望其他大典禮如耕藉大閱陪祀闕里大制作如纂

修

玉牒

實錄

典訓

方畧一統志監修

國史明史公無一不與元日元夕偕滿舊臣進爵

御前侍宴殿內俱出自

特恩至暢春園靜明園賞花泛舟

賜游

賜食則王書皆得隨公之後叨遇盛事者也三十一
年公以足疾請告

溫旨報曰卿効力年久自

世祖章皇帝時簡侍禁廷恪恭盡職朕屢加擢用存進
綸扉夙夜殫心勤勞自勵今

先帝舊臣俱已凋謝惟卿獨在班列雖精力就衰而老
成練達之臣常侍左右殊有裨益著勉自調攝

照舊供職不必求罷嗣後章三上慰留如初至
四十年夏疾大作

上於行在賜寶露禁藥九月又申前請乃許致仕比
奏謝特加少傅是冬

遣侍衛賁賜帑幣上珍明年上元節
賜讌於家四月

遣侍衛持

手諭一道

賜於榻前諭曰卿耆年舊德歷官最久自去歲告病
在家朕無日不注念老臣也邇來九卿皆求扁
額字對想卿身雖在告心未嘗一日不在朝中
故特書扁一面對一聯臨米芾書一幅賜卿卿
其勉強餐食輔以醫藥以慰朕不忘舊臣之至
意仍傳諭病少愈朕尚欲一見故公遺疏言冀
臣病之再甦許瞻

天之有日紀

聖恩也前後

頒賞

宸翰十餘幅

賜堂額三今年上元節復

賜燕於家公猶強起進一七箸越四日疾忽劇至二

十七日遂薨距生天聰二年戊辰七月八日享

年七十有六公服官五十餘年名成身退善全

終始視司馬文正之在洛下韓忠獻之在相州

庶幾似之而身依

天闕恩禮獨隆則前人所未及也公諱熙字子雍一字胥庭先世居任邱高祖贈宮保公龍始著宛平籍曾祖鏗祖愛明本生祖爵俱以文貞公貴贈光祿大夫太子太保禮部尚書公貴加贈曾祖祖如公官文貞公諱崇簡歷官光祿大夫太子太保禮部尚書公為大學士加太子太傅亦贈如公官曾祖妣某氏祖妣張氏焦氏妣梁氏

俱贈一品夫人公年十二梁夫人病篤禱於天
願減算以益母壽文貞公捐館公年踰五十矣
號泣如孺子顏書屋曰慕齋天性篤孝如此兄
弟六人友愛無間布政使然金衢守道照皆以
公推廕起家者也元配金氏繼劉氏俱贈一品
夫人繼董氏封一品夫人子六人克善雲南驛
鹽道僉事側室朱宜人出前卒次克勤幼卒次
克昌刑部河南司郎中董夫人出克宏歲貢生

候選主事克承克賡俱幼側室出女十人廕生
章維貞河南按察使胡介祉衍聖公子孔傳鐸
監生顧寧緯其婿也餘俱幼孫五人景魯庚辰
進士翰林院庶吉士克善出纘曾歲貢生候選
主事企曾式曾則曾俱克昌出克昌等將以十
一月十九日葬公於畏吾村之祖塋而屬玉書
銘於墓石公與先大夫同舉丁亥進士玉書又
夙附門牆之末晚在政地復知公深誼不敢辭

乃節錄韓慕廬宗伯所為狀而叙次之銘曰魏
魏王公惟

帝之弼夾輔兩朝其德克一文章琬琰謀謨著龜藻
揚玉几密贊彤帷內表百僚外靖三孽刑清兵
偃遠安邇悅五十餘年敬慎篤誠相業房杜家
聲韋平

帝眷舊勞曰予元老番番黃髮弗祿壽考老成在列
爵為國華固請引退養疴於家

手勅慰存中使問疾庶幾霍然扶掖造膝台曜乍掩
喪我功宗寵被異數用章殊庸罷舂輟相都人
爭誅德盛令終此惟臣軌世濟厥美有穀永貽
歿而不可勒此銘辭

覺羅洛君墓誌銘

君諱某字謙齋世居長白山之沾河祖諱唐柱
官建昌城守尉考諱石圖以五品官管顯親王
府事督潁墅關生子二君其長子也君少補滿

學生員由吏部筆帖式授禮部宣讀官轉戶部
四川司主事出理滇黔兵餉以薦陞兵部車駕
司員外郎加三級復以薦陞工部都水司掌印
郎中奉

命督西新關監理臨清磚廠後以估計護城河工料
去職君為人勤敏廉辦歷官所至有聲其為戶
部也故事刑部及督部司軍流罪人皆由戶部
四川司發遣而吏多留難有淹係至經旬者君

令到日即發囹圄為空各省籍沒家產具冊達
部奸胥輒深文咨駁借以牟利君立法禁之宿
弊遂革其理兵餉也由楚之常德水運至偏橋
衛陸運至平越黃絲驛道遠而險役夫多逃竄
大兵屯貴陽饑不能前君以厚直僦蠻苗為役
夫晝夜轉輸十二日達貴陽一軍懽呼士氣遂
倍時內閣學士佛公倫侍郎金公鉉以大臣督
餉屬酒相勞曰微君幾誤大事其為兵部也值

駕幸盛京緣途驛騎皆取辦於君無稽遲者佐尚書
薩公賑河東饑察核浮冒經畫有方災黎盡沾
惠其權西新也禁侵漁絕需索商民皆感悅而
吏無所容其奸蓋君政績之可紀者如此

天子以君為才嘗不用部議特用君或已別用人矣
復更命君往人皆謂之宜而同官亦莫之忌也
君性孝友母歿時年尚少哀毀不欲生父卒亦
如之事繼母如親母鄉黨之貧乏者周之無所

各教諸子嚴而有法子檢討君讀書成名奉使
不辱皆君之教也君生于天聰八年五月十二
日卒于康熙四十二年六月六日年六十有九
祖考以君貴皆贈通議大夫祖妣妣皆淑人娶
塔他刺氏封淑人子四人長阿金

日講官起居注翰林院檢討次阿保早卒次德芳次
德馨孫男六人女一人檢討余辛未所得士也
將葬來請銘遂為之銘曰維才之宜維用之時

不昌其施有後之貽後千斯年視此刻辭

誥授光祿大夫內閣學士兼禮部侍郎愚菴李公墓

誌銘

公諱應鴈字柱三一字愚菴其先自海東桃園
遷青州之日照今為日照人曾祖某廩生祖某
鞏昌府學教授父某順治辛卯科舉人歷任江
西浮梁縣知縣自曾祖已下以公貴皆封贈如
公官妣皆一品夫人浮梁公生子八人公其次

公少有文名讀書過目輒成誦丙午舉於鄉署
天泉學正造就人才為多汪公文漪亦親問業
經指授焉丙辰成進士改庶吉士授編修纂修
明史已未同考會試得人稱盛歷春坊洗馬以康
熙三十^闕年督順天學政既歲滿公明之譽蔚
起

天子以公為才復留任三載蓋公之典學政也絕苞
苴嚴請託釐正文體振拔寒滯又請置學田以

資贍養增弟子員額以廣進取一時人士無不
鼓舞嚮學而公又引近諸生反復開導以讀書
為文之法于是人知研窮經史為有用之學而
文氣亦駸駸復古公起家詞臣政事無可表見
而京畿首善之地學校教化之本公能懃懃懇懇
殫心力於此亦可以見才識宏遠體用兼備之
大畧矣還

朝進庶子

特授太常寺少卿旋陞內閣學士兼禮部侍郎越數
月以事罷歸公為人凝重有風骨不苟訾笑其
在

上前時有

顧問輒應聲而對無所紆回班行中持議尤侃然亦
以此齟齬不合於世不得至於大用論者惜之
公性純孝事浮梁公敬養交至歸田時浮梁公
年踰八十公年亦五十餘矣而先意承志猶有

嬰兒之色兄弟友愛尤篤叔季早世撫其孤不啻已出他若族屬之貧窶者無不衣食也姻黨之于我養于我殯者無不周恤也歲饑出國粟減價以糶或捐于公以待有司之賑凡義之所至無不力也嗚呼晚近士大夫以功名為急而畧於內行父子兄弟間多有慚德其于宗族鄉黨視若秦越人然惟公孝友肫篤施於家以及於國而一以至誠行之豈不可謂鉅人長德卓

然為世所倚賴者乎三十五年春

車駕北征公在籍輸財助軍復親轉粟塞外以濟軍
食跋涉數千里不辭勞悴比蕩平錄功復公官
踰年奉

命分脩永定河復改修南河公親巡畚築屢厯寒暑
猶憶四十年冬余過高堰遇公于周橋時公立
風雪中董工作甚力余與公握手相勞苦者久
之又二年而公乃告竣事奉

優詔還籍仍晉二階公以久勞邁疾復遭浮梁公喪
老而致毀未幾遂不起生某年月日卒某年月
日年六十有六配梁氏封一品夫人子男五人
某歲貢生某太學生某順天己卯舉人某某太
學生孫男八人孫女七人婚娶皆舊族公既卒
之三年諸孤卜葬於聚奎山之陽司業黃君崑
圃持狀來請銘公自官翰林與余交久黃君則
公所拔士也述公里居事尤詳爰損益來狀而

為之銘曰叅預機務官不卑年踰指使壽不虧
樹人如穀勤斯蓄或芸或耔終如茨建章栢梁
采棟資材已見用未究施惟孝而友為世師永
貽不朽鐫銘辭

誥授光祿大夫總督浙江福建等處地方軍務兼理
糧餉兵部尚書都察院右副都御史瑞圖劉公
墓誌銘

康熙四十七年夏六月前浙閩總制兵部尚書

寶坻劉公年八十終於里第越一月公長子湖
廣巡撫右副都御史王伯先生聞喪釋官歸庀
大事寢苫枕塊凡三閱月將以十一月之下旬
奉公體魄藏于縣豐臺之舊阡欲紀公立朝居
官家庭鄉黨諸大節於窆竈之石偕其季弟洒
淚具書以來乞銘于余惟公鴻名偉績彪炳宇
內甲寅以後當用兵之際常以大帥持節駐海
濱江浙晏然得安枕席者皆公之賜王伯先生

司藩江左五載中兩遇

翠華南幸經紀百務秩然有條

天子稱之曰才其他緩征減耗惠政尤多是公之父
子為福於桑梓者至深且厚於茲麗牲之文其
何敢辭按狀公諱兆麒字瑞圖曾祖國楨父世
則皆以公貴階光祿大夫如公官曾祖妣李氏
祖妣褚氏王氏妣魯氏皆一品夫人先世江南
徐州人自曾祖洛臺公始卜居寶坻縣東之豐

臺封光祿善徵公生二子公其季也公幼而端重寡言笑舉止如成人讀書過目即成誦為文皆有理法年十四時遇

太宗文皇帝觀兵畿輔亟收人才見公異之令入官學讀書年十六隨

世祖章皇帝入闕又七年

詔選漢軍滿漢文藝以范文肅公為考官公名列上卷遂授翰林院編修公起家布衣為侍從感激知

遇勉勵職業

世祖屢幸內院見公年少敏練心喜之十年中歷進都
察院啟心郎又改宗人府隨進都察院左副都
御史時公年未三十而丰采整暇每奏對輒當
上指人知旦暮將大用公矣順治十八年滇黔既平餘
黨散入楚省安輯需人遂擢公湖廣巡撫

今上即位大兵雲集征勦公料理軍需賁送芻糗公
調度有方不數載而伏莽悉定蒙

特恩加授工部侍郎楚人新罹兵燹公撫定隳咻寬
嚴交濟仁恩被于江漢越三十餘年而玉伯先
生繼官此土遺民故老猶有擁馬首問公起居
者可以知公德澤之入人深矣康熙七年擢四
川總督任事未久以裁缺回京師而在蜀數月
招徠流移綏輯凋瘵不遺餘力嗣後進秩兵部
尚書加從一品仍以撫川民功也八年授浙江
福建總督時海氛未靖兩省皆稱巖疆公條上

防海機宜老謀碩畫鑿鑿然洞中肯綮兩省賴之以安十二年入京

陛見適當三逆叛命廷推將帥之臣

皇上特用文臣三人改銜以往公其一也初任直隸援勦提督僅一年三輔清晏改授江南崇明水師提督崇明密邇海氛地稱險要公請自擇偏裨預儲糧餉壯我之威伺寇之隙

上稱善再三悉兪所請由是坐鎮十年內地寧謐人

不知兵二十三年俄羅斯犯順大兵深入征伐
命于大臣中擇賢能諳練之員以掌軍事遂以公為
黑龍江總督督兵三次克奏膚功至三十一年
邊塞既靖而公亦以年踰六十母老在堂拜疏
乞歸

優旨俞允自是徜徉林泉遂初樂志公于功名之際
可謂報國保身兩得之矣乞休後六年以致政
大臣監修北河工既竣

聖心嘉悅仍復公總督兵部尚書從一品玉伯在吳

中迎

駕時屢頒賜公尚方珍物兼

問公年貌及提督海疆歲月幾何公之上膺

主眷久而彌篤真人臣之殊遇也以余攷詩書所載

若方叔召虎仲山甫諸人皆入為卿尹出為牧

伯無事則任旬宣有事則兼將帥未嘗不嘆文

武成康之化蘊釀有本故其人才之盛至于如

此今觀劉公一身培養于諸生之中者

太宗皇帝也歷試于侍從執法之列者

世祖皇帝也用以經文緯武敷歷中外者

今上之識拔也而公之才無往不宜視昔方召山甫

亦媲美無愧自公歿而中朝故老零落殆盡求

太宗朝之後人不可多得矣公孝友性成家門雍穆可

為當世法生平守不欺之學上自僚友下至故

交皆終身如一利人濟物之事見無不為不能

盡書特書其大者嗚呼公道德事業備人世之
極盛壽躋八十而神明不衰身見子之為大官
繼前業餘亦游歷郎署待綰邑符且身後踰兩
月而長孫復舉京兆公存順歿寧無復餘憾而
伯玉昆弟猶必假予一言以傳信永久余益嘆
仁人孝子之心之不忍自已有如此也公生於
天聰三年己巳十月十九日子時終於康熙四
十七年戊子六月十二日午時享年八十歷官

總督浙江福建等處地方軍務兼理糧餉兵部
尚書都察院右副都御史加從一品康熙九年

五月

覃恩進階光祿大夫初娶陳氏繼配鈕氏

贈封皆一品夫人又娶郭氏以子貴推恩

貤封孺人皆先公卒與公合葬子三人長殿衡即伯

玉先生也公親兄進士瑞符公季子公早年未

有子承繼為嗣由一品廕生歷官巡撫湖廣都

察院右副都御史娶張氏次殿璣廕生官工部
員外郎先公卒娶王氏次殿章歲貢生候選知
縣娶佟氏皆郭孺人出女四人一適徽州府通
判靳治齊一適候選通判梁求正餘早卒孫四
人長嵩齡戊子科舉人次昌齡候選通判次永
齡太學生皆殿衡出永齡嗣殿璣為後次鶴齡
殿章出孫女五人曾孫一同曾曾孫女一俱嵩
齡出余既槩括來狀所載而並繫之以銘銘曰

盤山之陽海波萬頃鬱鬱葱葱煙閣霧井篤生
偉人直大以方年如高密仗策從王史校石渠
牒編玉葉臺栢清嚴秋鷹勁捷茫茫雲夢盜弄
潢池非公持節孰底定之浙水潮平閩山烽伏
帝曰宗臣甲兵在腹元凱書癖叔子裘輕虬如卧虎
屹若長城萬里龍沙據鞍倚樹戢戢伏波勲高
銅柱歸來私第白袷練裙皤皤黃髮感我

聖君有子承恩肯堂克荷後嗣繩繩家聲永大維公

令德朝野所望歸然一柱若魯靈光天不憖遺
倏焉凋喪箕尾芒寒士林惆悵維三不朽可範
可型千秋紀載史冊汗青豐臺之瑩林深土厚
安彼佳城是封是甃上峙雙闕下疏九原悠悠
億歲視我銘言



張文貞集卷十

欽定四庫全書

集部

張文貞集卷十一

詳校官起居注主事臣顧宗泰

助教臣常循履勘

總校官進士臣朱鈐

校對官修撰臣吳錫齡

謄錄監生臣徐步青

欽定四庫全書

張文貞集卷十一

大學士張玉書撰

誥授通奉大夫巡撫貴州兼理湖北川東地方提督

軍務都察院右副都御史介菴王公墓誌銘

康熙乙丑丙寅間王公介菴以兵部武庫郎出

知吾郡鎮江府事時除方伏處堊廬杜門屏跡

而輒聞父老之稱述公政績者無虛日曰某弊

革矣某蠹除矣某雜派停矣某被戍兵凌敎者
事得直矣曾不踰歲令行禁止肅然以清而公
乃修葺學宮創興義塾日講求教民禮讓之道
以庶幾古人漸摩風俗之意而初不見治郡之
繁夫京口旗民錯居素稱難治支給月饗尤太
守之專責先是領饗于藩司而藩司不以時給
往往衆口譴呶禁之弗戢甚有藉辭告貸恣行要
挾者公至郡力言於上官有請輒應給發無稽

時于是驕兵悍卒皆屏氣帖息莫敢有後言比
余在政地與文靖公同奏事

上顧問王書知府王燕居官如何即奏守甚清才亦
能任事民皆感之

上為首肯既退而文靖公謂余曰僕方與公共事公
獨不避嫌耶余曰君父之前不敢不以實對也
時

聖明已深察公賢未幾即擢任江蘇按察司使案牘

繁蹟江蘇為最公聽讞無一留獄律例所在不敢以意毫髮重輕屬吏奉公指凡所上初招獄辭亦無敢以他請苛比飢法行私者七郡之獄稱平甲戌夏晉湖廣布政司使是時楚省方行鼓鑄藩司董其從而宿弊叢集官鑄之外奸鑄倍增因而榆莢縱環十不當一上下官吏漁獵於中莫肯摘發其事者公抗顏白督撫謂武昌錢穀雜已極勢必不行錢滯不行則上下交困

非立罷不可條其事上之楚鑄乃罷其他收支
抑勒輸納重耗諸弊悉明示釐革州縣奏銷額
費歲派取于民間者亦嚴諭禁絕有費即身任
之閱四載湖北藩庫無銖黍浮冒虛詭之病皆
公力也歲戊寅

特旨授都察院右副都御史巡撫貴州公念黔省處萬
山之瘠地荒而俗敝非力行教養無以廣生聚
而興德化因具疏言全黔荒田十居三四屢諭

墾闢而民不輒應蓋墾經數載然後收穫所入
薄不足輸稅故人懷觀望倘悉依減則寬以六
年未有不鼓舞爭赴者賦雖減重就輕田則易
荒成熟是于國稅原無損也又言

聖朝誕敷文教徼外苗獯靡不嚮化而黔省師儒之
官尚多未備各州縣衛有初未立學宮者有有
學無官而附試他郡者請依滇南故事通省建
學設官文武童一視小學收錄廩貢亦舉行如

例則人心感奮教澤自濡奏上俱如所請苗人掠劫事所時有而有司處分特重公言諸苗供辦徭賦非野苗可比特一旦負罪而竄入叢篁深箐難以立禽倘即議有司降黜去官則人才可惜且罰既重諱盜者必多請依常例限年追緝庶盜可捕而民生益安章下九卿廷議亦從公言而公又時頒條教飭州縣官吏無縱奸人詐索土司以啟爭端尤得拊循苗人根本之至

計鎮寧州民曹邦傑妻張夫亡從死法不應旌
公力為之請謂地介荒服節烈罕聞張氏敦篤
倫常實可矜憫伏冀破格表一婦之完貞以勵
全黔之風節

上特恩許之四方咸傳誦焉公于邊地民生吏治悉
心籌畫以次見之設施越三載勞瘁倍至忽感
疾咯血盈盂遂以乞骸章上一時制府提閩僉
言撫臣正已率屬吏畏民懷一人之去留實係

巖疆之休戚隨有

旨命供職如舊衆皆慰悅公力疾視事復二載有餘而痰嗽轉劇四十二年秋更申前請

詔迺致仕去黔之日遠近軍民苗獮遮道拜送見公形容癯瘠輒相顧泣下公亦為灑涕以別蓋遺愛至今不忘也宛平王氏族望鼎盛世德相承余于文靖公志中書之詳矣公顯考太子太保禮部尚書文貞公諱崇簡以子文靖公熙貴

加贈太子太傅保和殿大學士妣梁夫人累贈
一品夫人生母周夫人以公貴贈淑人文貞公
生六子長即文靖公次湖廣桃源令樵次巡撫
浙江副都御史然次金衢道叅議照次即公諱
燕字子喜个菴其號也又次則公同母弟刑部
員外郎默公兄弟友愛至篤自默中還時員外
君方僑寓金陵因往就醫居半載始入京師時
文靖公初逝公見余深嘆同氣六人存者僅半

惟余兄弟之戚亦與公同相對太息者久之余
忝辱公世講公在黔中數千里致書締姻好因
以杭州守第五弟女許字于公子克慎公嘗欲
携令子就婚于杭並省兄中丞公于官署乃此
願未遂一夕疾作竟致不起可深痛哉公卒以
康熙四十七年七月十二日距生順治九年十
月七日享年僅五十有七元配張夫人利津知
縣諱文燠女繼袁夫人巡撫山東工部尚書謚

清獻諱懋功女子七人克寬前卒張夫人出克
慎克修及幼子如玖袁夫人出如珽如珪如璋
側室出女九人孫二人希曾守曾公長于詩前
後集若干卷奏牘之文條剗切皆公所手定
公事業彪炳惠澤在人而立身行己無愧無怍
所獨惜者未登大年耳而公亦何憾焉茲以四
十八年十二月某日卜葬宛平縣骨香山社之
新阡克慎奉袁夫人命來乞余銘不敢辭銘曰

文貞文靖艱哉績武英姿懋紹不藉華廡初守
京峴百穀膏雨屹屹崇祠大江之潯平刑于吳
核賦于楚黔山際天徼往開府農耨蒿萊士藝
榛莽椎髻者苗亦歌且舞引疾言旋如嬰失乳
遺澤未沫如日長煦史冊大書名莫與伍爰勒
碑版貽示來許

誥授光祿大夫內秘書院學士張佳公墓誌

余為史官時今侍御賽君方官中翰屬余叙其

先公所為北海集余自惟晚學後進得挂名于
公文字中以為生平之幸及今二十餘年矣
君復以公墓石之文鄭重相屬蓋公之初墓在
都城北之關西庄繼兩夫人祔墓改墓于城外
之宋公庄復以地勢卑濕改墓于盧溝橋西之
太平橋先達鉅公傳誌之文載公之行事者備
矣余更何贅辭惟掇取諸公所叙錄有關於公
建樹之大節者序而誌之並以誌改墓之歲是

則賽君之所以顯其親于有永者也按公姓張
佳氏諱鄂貌圖字麟閣遇義其號也自始祖以
下世居長白山鄂莫和索洛之地遞傳至曾祖
諱瓜喇始遷輝發祖諱代廕布祿又遷葉赫南
地名張尼和樂居焉父諱吳巴泰母覺羅氏及
公貴曾祖祖考皆贈光祿大夫妣皆贈一品夫
人公體貌魁傑屹如嶽峙幼善騎射稍長即嗜
經史恭遇

太祖高皇帝肇基東京嚮用英俊之士公輒講求文武
大畧以冀為

國家異日之用每搆一編研索窮日夜久之才譽
蔚起

太宗文皇帝崇德改元益尚儒術歲戊寅拔公一等秀
才

賜布帛時

召見講譯書史辛巳初設制科公應舉居第一

賜頂帶選入內院校譯會典順治元年冬

世祖章皇帝入關定鼎公與扈從旋授秘書院侍讀奉
命編纂

兩朝實錄書成賚白金文綺又譯通鑑及詩禮二經于

凡草木鳥獸之名器物象數之實考辨精核能
補箋疏所未逮公博洽載籍兼通兵家言諳習

韜畧

廟堂知公才能以經術贊軍務于是

大師所至皆命公偕行流寇李自成既從一片石潰奔餘黨直趨關中公從和碩豫親王師追擊于潼關大破之遂平陝洛嗣江南兩浙以次削平屢用謀策制勝公之功為多

優詔褒美特加錫賚三年從征南大將軍多羅貝勒征閩說降其巨帥鄭芝龍事聞

賜文綺八良馬二四年從和碩鄭親王征川湖所嚮底定辰沅九溪十二土司暨生苗徭獠悉先後

受撫八年師還進宏文院侍讀學士兩遇

覃恩授通議大夫加拖沙喇哈番又加拜他喇布勒
哈番是年秋充順天考試官取士七十人後多
至顯官十年進內秘書院學士復從和碩安親
王出塞征喀爾喀部落收服其衆十一年以閩
海梗化復從鄭親王世子率師進討黃梧來降
修築漳泉郡縣凡十四城而濱海諸路以安十

四年

覃恩累進光祿大夫加一級明年改中和殿學士兼
禮部侍郎仍帶加一級又從多羅信郡王進取
雲貴深入其阻百蠻皆就撫自此海宇一統

朝廷盛德無所不震疊矣十八年復改內秘書院學
士是年秋班師道感寒疾以十二月二日卒于
天津之楊村年四十有八

上震悼

遣官諭祭賜金五百兩造塋廕二子入監讀書長即

今侍御賽圖由內閣中書歷中書科掌印中書
改監察御史次賽良今官三等侍衛公當國之
初以著作謨議為一代文臣領袖而自入關以
後馳驅兵間者十有餘年歷秦楚江浙甌閩滇
黔萬餘里蠻烟瘴霧之區叢篁深箐之域無所
不經躍馬涖陣摧堅折銳之事無所不預戰守
攻取擒縱勦撫之機宜無所不備行間飛書馳
檄以及箋表露布皆磨盾立辦而又以其餘力

登臨覽觀感時物紀風土錯載于篇什詠歎之
內如所遺北海集其什伯之一二也而生平建
樹之鴻駿亦畧見于此矣

誥贈奉政大夫內宏文院侍讀田公墓誌銘

太學生田子惟冀與其弟孝廉惟究持其王父
贈大夫行述泣而白于余曰先侍讀之易簣也
有墜言焉曰吾死而不克葬吾父無以逃于公
羊子過時之誅小子識之速營葬以竟吾志葬

則志墓之文必乞之高陽夫子夫子知吾之欲
歸而以預修

國史未逮也惟冀等敢以先人之命請蓋贈大夫
之歿距侍讀之歿十有五年矣丙午丁未間侍
讀嘗欲以歸葬具牒乞假會

召入史館不果庶幾

國史之竣則酬所願焉不謂其遽逝也按田先世
居固安縣張華村東捍社系遠不可考前明永

樂間有諱旺者以軍功為遼東東寧衛掌印指揮同知子孫世襲遂家于遼五傳諱鉞居次不當襲用經營起家鉅萬鉞生大成為邑庠生大成生養民貢入太學前明萬厯中歷仕至兗州府魯藩護衛經歷卒于官葬城東南自是家于兗經歷三子長生璧襲世職次即贈大夫諱生蘭字馨野年十六經歷筮仕日照縣簿隨入關性嗜讀書經歷為延山左知名士蘇君某相君

某與公日相鏃礪公氣益銳文益奇二君皆遜
謝以為不及後二君相繼成進士而公因僑寓
不得應試迄無所成就經歷既即世家計中落
生壁以襲職宦遊于外十餘年未嘗一至充旅
舍環堵食指日衆一切悉公經紀之公與生壁
異母壁母為白太孺人公母為陳太孺人公善
事兩母色養備至白疾篤公親侍湯藥目不交
睫者月餘及卒喪祭盡禮撫兄子如己子推甘

讓肥幼而育長而教卒無倦色前明末盜賊蜂
起公孤踪客寄不遑寧處于是裹衣南徙展轉
于淮陰秦郵廣陵之間所至不數月覺有變旋
復他去既去而其地輒往往多故以故人咸服
公之智而又嘆公盛德食報雖坎壈百折而能
自脫于難也繼遷江寧適當鼎革之會

王師南下羣不逞之徒乘亂伺釁日尋戈矛以修復
私怨豪帥馬某所隸士卒素不馴一時爭欲甘

心而公有鄉人某亦隸馬戲下一夕携其家數十口奔詣公避害公納焉或持械大呼于門曰速出之可免禍不則汝家立齏粉矣公曰彼雖非張儉我獨不能為孔文舉耶不聽諸亡賴亦稍稍散去比事定絕口不復言蓋公平生行事仗義負氣大率如此歲丙戌復自江寧卜居廣陵杜門課讀以累葉未竟之志勗諸子辛卯侍讀舉順天鄉試壬辰會試中式聞捷且喜且悲

曰恨不及吾父見之侍讀未及與

大廷之對趣歸省覲公相見益喜未幾疾作疾既
革猶強起叩陳太孺人寢門問安顧謂侍讀曰
汝曹善慰白頭之心則吾死瞑目矣越一日遂
卒公生于前明萬厯丙申十二月初五日卒于
皇清順治壬辰七月初九日年五十有五嗚呼俗之
敝也家庭骨肉或相背負若行路而況其為門
以外乎公孝友篤行至老不衰如鄉人避難一

事存活數十口呼吸之命于危疑艱險之中豈
非太史公所云天下之陰德宜享祀十世者乎
三十年以來衣冠氏族轉而為樂盈之敗若敖
之餒者比比皆是而公藏仁賚後歷久益昌侍
讀既貴且顯而諸子若孫方踵起未艾是亦可
以觀天道矣配孫氏文學諱某公女勅封太安
人子三人長即侍讀麟戌戌二甲進士歷官編
修司業內宏文院侍讀娶孫氏次彰廩例監生

娶劉氏次駙太學生聘翁氏孫五人長惟冀廩
例監生娶劉氏次惟充癸卯舉人娶劉氏次惟
徐郡庠生未聘次惟楊聘范氏次惟荆聘蕭氏
女孫三人曾孫三人長之譽次之雋次之髦以
某年某月某日葬于某原銘曰京兆望族厥生
偉人肇遷自東寢跡廣陵食貧躋險歷困益亨
天書爾遇惟德永存杖豐萼跼實蔭本根語曰
不於其躬則於其子孫爰作斯銘用表君之墓

門

文學李君暨周孺人墓誌銘

東強文學李先生歿後三十年其子公旋名履
祥與余同舉順治十八年進士又八年先生原
配周孺人沒康熙九年春公旋遣使持狀來長
安屬余為祔葬銘且曰祥不幸八歲喪父時兩
兄涉訟于外幾不克襄大事賴母氏營葬縣棺
而封不設碑絆今吾母又棄藐孤逝矣卜某月

某日啟先大人壙奉吾母柩焉乞吾子為文以
藏識幽宮感且不朽余聞之少不誅長又學殖
荒落慙不能為先生導揚德燬于萬一因重違
千里寓書之意不敢辭謹損益來狀而為之誌
按狀先生諱維聰字足臨先世江南之句容人
前明洪武間有軍功而御賜麕喇李者來棗強
家焉遂為棗強巨姓數傳至文林郎南城兵馬
副指揮省吾公是為先生父先生生而器宇凝

重自幼無子弟之過弱冠括羽鏃礪肆力於經
史不為老生俗儒剽竊塗墜之學尤嗜讀班氏
書故其為文雄渾灝演卓然成家既補弟子員
旋食餼試輒高等四方文學知名之士絡繹訂
編帶交其所辨論皆經世大畧凡古今地理官
制河漕錢穀與夫武備之強弱設防之要害無
不涵肆穿貫如數一二時太史楊崑阜梅長公
兩先生負海內人倫之望重交遊慎許可先生

親執經其門兩先生深器重焉屢試棘闈不得志而去之泊如性至孝省吾公司南城偶遘疾先生聞之兩日夜馳數百里至京邸親侍藥餌疾愈而後返嗣遭兩艱哀毀盡禮篤念宗誼族有嫠婦無所歸厚遺之衣食貧不能自贍者鬻周孺人簪珥給之其他婣睦戚黨大抵類是夫世衰俗薄重利而輕義劉孝標所謂不費半菽落一毛而坐視三黨之困窮者比比皆是而先

生以一諸生勉強好施老而不倦豈非所稱古道篤行之君子歟晚年構五一亭于舍南百武許蒔花藝竹歲時偕二三執友浮白吟嘯率以為常曰人生天地間須令造化生意與自家意思盎然太虛中耳嗚呼是可以知先生之學矣先生沒而家難起內侮外訐磨牙吞噬有如沸羹長公次公奔走牒訴無寧日餘孤梵梵襁褓閱十年而後家難少息凡此十年中食荼集蓼

猪柱門戶不至有尺寸中落者皆周孺人力也
孺人為故城文學純吾公女太司馬衛陽公女
孫年十七于歸先生廟見後攻苦操作力以世
俗女子貴倨之習為閨門戒尊章繼述相夫子
經營喪葬先生沒日夜督課季子涕泣語之曰
而父力學不逢年今已矣終父之志是在小子
辛丑公旋成進士孺人怡然色喜曰未亡人可
報夫子于地下矣公旋以選人需次家食侍養

者八年孺人惓惓以家世清白為訓卒之前夕
猶誨誨教戒夜分不寐及旦竟無疾而逝年八
十有九嗚呼當前明之末季吏道雜流品清矣
脂韋訛渝之徒皆得掇拾青紫以先生蘊道抱
德身負不羈之材而鬱鬱終老曾不得少見設
施于世歷今四十年曩之碌碌負乘者已與腐
草同萎而一孀嫠撫八歲兒讀書成進士遭遇
盛時異日將光大先人未竟之業以垂不朽顯

晦遲速之故可為三嘆也已先生生于前明萬
厯庚辰十一月十四日卒于大清康熙戊申十
二月十一日男三人長某次某次即履祥辛丑
進士候選知縣銘曰滹沱清漪恒嶽巉巖篤生
真儒外弢中完淑人作配母儀克全塗墉終畝
勗哉象賢積德流慶片石永傳松影在地白雲
在天

誥授奉政大夫分守口北道山西布政使司叅議蓼

庵袁公墓誌銘

自國家以才能課吏治於是內外大小吏皆務
矜才鬻能為踴躍於功名之道而老成明練守
正不阿鑿然欲以經術飾吏事者其功名顧反
居後此有志經世之士所不禁搢擥嘆息者也
曩日諸曹郎爭用奔走結納以游踞津要之路
少叅袁公蓼庵時為工部郎中獨有清直聲大
司空掌雷傳公深器重之未幾以例出為陝西

甘山道僉事公既出而資望在公後者輒相繼
登臺省班行中咸為公稱惜而公處之恬如也
及今踰十年甫一轉官復得邊地乃未及一載
遽以疾卒不獲大竟其用豈不痛哉初公以乙
未成進士筮仕陝之乾州乾當兵燹之餘民俗
滋敝公至壹意拊循不數年流移者皆復業丁
酉分校拔知名士六人庚子擢工部屯田司員
外明年晉虞衡司郎中公討論掌故諳習部務

胥吏歛手不敢牟毫末之利當是時滇閩間饋
餉旁午會山陵大工經費並不繼詔直省正賦
外每畝暫增課一分用佐急需公職司焚帛曰
民困極矣寸縑尺縷皆閭閻膏血也力清乾沒
省金錢鉅萬他所裁抑類是既至甘甘為河西
重鎮戍防之地西海諸部覬覦大草灘比歲闌
入牧馬者不絕復遣使請割灘地蓄志叵測康

熙九年

朝命兵部侍郎科公爾往偕提督張公勇度地畫
界張公持議堅爭者不能奪大草灘卒得不與
而左右贊畫之者公之力也公與張公交驩無
間時叅預密謀自畫界以後西海部人不敢復
窺張掖邊境肅然甘州距西寧鎮千有餘里往
歲協餉西寧負載轉輸蹄踵交道甘人苦之公
力請得罷主客兵待哺數千人公悉心持籌軍
得宿飽庚戌詔簡監司具才望者入為卿貳直

省合格者纔十人公名列牘中未及用辛亥升
口北道叅議口北地确田蕪民貧而賦重前人
怵於考成謾稱歲輸如額而逋課累積幾以千
計其粟儲于倉者歷歲侵漁耗蝕不可筭數非
按籍核實無以釐宿蠹顧欲求垢索瘢則失察
之罪先坐太吏太吏聞公言皆陽聵而陰阻之
公擘畫盤錯憊心罷精申旦不寐居數月食日
益損會閱工口外為災燬所中疾大作旋具牒

乞休比得

俞旨而公已不起公未嘗自瑯琊為才能而其始終
勤事如此嗚呼如公者真可謂國之勞臣者歟
公諱州佐字左之號秋水蓼庵其別號也袁系
出漢司徒安代有聞人宋南渡後占籍會稽數
傳為柱南公負異才杖策游燕為某大將軍揖
客生二子長諱紹元為廸功佐郎累贈奉政大
夫是為公父贈大夫偕弟紹寵携貲客游濟上

遂家焉生五子公其季也公生九歲而孤母周
太宜人復早逝公刻自鏃礪專精制舉業舉故
明崇禎己卯鄉試為孝廉多奇節甲申避亂會
稽

世祖章皇帝既平中原復携家還濟壬辰就高苑縣諭
隣邑士爭從之游乙未禮闈家大人與分校實
得公卷秉燭擊節謂他日當以經術名世今言
驗矣余與公稱世講常北面事公公亦以幼弟

畜每相對語輒昵昵竟日在甘州入覲者再為
余言邊塞要害戰備守禦狀原委顚然謂邊地
土狹農稀宜用開中法分河東鹽引三之一輸
粟河西以資軍食又宜簡練鄉勇拔置卒伍可
不待召募而坐收精銳千餘人公之言未及効
而公不可復作矣胸中儲待經術矻矻白首不
獨當世無深知公者而天亦若厄之可悲也已
所著有孝經注解植香齋詩集奉天志餘四雋

等書行世生前明萬厯丙午三月十五日卒

大清康熙壬子十一月十四日年六十有七配童

氏誥封宜人子三顯祚庠生顯祐顯祺俱幼撫
養子顯經公族甥也憫其孤字之女二一適魯
一適胡先公卒孫三麟獬豹女孫一顯祚既扶
公喪歸以公同年孝廉鄭君與僑所為狀謁銘
于余余辱知公者不敢辭因撰次公行事而為
之銘曰世風訛渝波流弔靡礪礪郎潛履道如

砥陰摯陽煦邊陲肅清巖關揅天公功與京量
才百斛甫試八九讀書充宇藏仁賞後仕逾一
紀歛無遺貲我哀我友銘無愧辭

誥授光祿大夫工部侍郎費茂公墓誌

余嘗繙閱

國史伏見

祖宗朝鷹揚戮力之士項背相望雖當偏裨之寄其建
樹已不媿為名將而況久歷行間戰功可一一

指數者乎至於武績既茂而又游登卿貳以清
勤盡職為

國家耆舊大臣則尤前史所不能多覲者也工部
侍郎費茂公諱某長白山東巴海人公父贈光
祿公諱某當

太祖高皇帝龍興之初即以其族自巴海來歸越三載
歲在甲辰而生公于興京之赫門村公天性孝
友方五六齡時母夫人為製新衣公見諸兄無

衣新者輒不肯服比及十歲事親敬長儼若成人且穎敏嗜學習滿書數月即貫通文義稍長勇毅過人精騎射嘗以公事遠出忽聞父病篤單騎遄返夜行灌莽中馬傷足僵卧公仰天號泣曰得見吾父即死無恨奈無馬何不移時馬起竟馳歸侍疾三日而贈公逝人以為至孝所感越數月又遭母喪哀毀幾滅性比喪禮既畢遂銳意立功名以成父志初從征旅順奪幟登

城為一軍冠大帥以一等功牌予之公曰余雖
先登尚有貫藍甲者在余前安可冒也辭讓再
三而自居二等大帥以下皆嘆異焉取安珠山
時敵軍大集公率步軍爭先力戰大敗之守錦
州南山城敵衆夜襲我軍戰却之城得以完奉
使黑龍江收初勒里國有招徠功取明寧遠城
衝鋒前進被鎗箭傷入關之役率漢兵與流寇
戰大破賊兵昌平州遇敵突入敵圍被重傷猶

手殲二人生擒三人而還嗣取寶坻通州皆有
功順治元年

特命管佐領事從饒餘郡王征山東有取勞山功又從
和碩豫親王追擊流寇至潼關率先破賊馬軍
功居一等豫親王轉旆江南公復在軍中拔蘇
州城時敵將黃蜚合四總兵軍力拒城南公以
四十騎大敗之盡獲其戰艦鎗砲旗纛蘇州既
克蜚等復縱火攻城焚橋凡三至皆敗之自入

關以後大小約百餘戰身中一等傷者以十數計創癰鱗次幾無完膚而銳氣未嘗少挫方

本朝初克遼東罹法網者甚衆公所至安撫善良多所全活師行數十年自臨陣誅戮外從未殺一不辜俘纍得更生者所在皆是蓋公生平仁心為質如此又素性廉潔從下江南江西浙閩東粵諸路皆兼領戶工兩部事軍中所獲金貝玉貨幣大帥一委之公公悉具冊登載無銖黍

絲粒為私用者一軍稱服師旋擢工部郎中

朝廷知公有守賜良田七頃居第一區嗣是修

郊壇樂器儀仗及

南苑行宮

兩賜金幣朝服督造

永陵工成加拖沙喇哈番

郊配禮成加拜他喇布勒哈番天下一統又加一拖沙

喇哈番順治十六年進

盛京工部侍郎

福陵前渾河環繞時以漲溢衝損紅門屢遣官督修不
就公至董築大堤成永無水患康熙六年

覃恩授光祿大夫又數歲引年致政十一年

聖駕東巡錫宴大政殿念公為三朝老臣特

召近御座以金卮酒賜之並

賚冠帶狐裘鞞刀諸物公每痛兩尊人早逝愜聞優
見追慕不忘遼陽收復後即訪善丹青者指授

繪像以祀于家廟祖父母則刻木主奉焉歲時
朔望及春秋節序必躬親展奠年踰七十而禮
敬不衰兄弟十人諸兄皆先公卒惟第六兄
尚存公事之甚恭田宅服食車馬僕從悉推以
與之遇

恩蔭不與已子而與兄子公山第某兄子索泰少孤
公撫育成人教以讀書成乙未進士

殿試第一甲三人公上念高曾世有陰德而譜牒

殘缺恐年歲久昭穆益紊遂手輯家譜垂于奕
世又撰務本家訓一書宗族中貧者衣食之孤
寡者收養之無後者春秋祭之至今子孫猶遵
行勿替康熙十六年病篤令諸子立侍榻前勉
以忠孝以三月八日坦然而逝年七十有四嗚
呼史稱鄧高密功高於諸將而修整閨門教養
子孫皆可以為後世法如公之才兼文武內行
篤謹以此媲美前賢何多讓焉子五人英山內

務府營造司郎中荆山太常寺卿青山

盛京禮部贊禮官名山筆帖式天保壬午副榜孫
十五人興德興保俱候補筆帖式德音丙子舉
人內閣撰文中書德玉都察院筆帖式德隣明
玉亮德德新俱候補筆帖式祁蘭保貢生筆帖
式德容生員明德宏德鄂紳德琛永貞俱業儒
余與奉常公及中書君交久茲奉常公命撰次
公懿行勒於貞石不敢辭因据原傳書其事之

大者以示後人

處士鳧盟申君墓誌銘

嗚呼是為廣平處士鳧盟申君之墓君端愍公
長子也方順治壬辰癸巳間

世祖章皇帝以節義風厲天下

詔諸司體訪前明死節諸臣將特舉表忠封墓之典於
是諸司以故太僕寺寺丞申某名聞者章六七
上顧流傳錯互聞見異辭或誤列太僕為自縊

君聞之慮異日承譌襲舛無以徵信史乃從泥淖徒跣千里赴京師麻衣經帶痛哭都市具述其先人王恭廠投井自盡狀栢鄉魏公貞庵時在諫垣業具疏白其事會君至而其言益信所司既核實遂蒙

特恩諭祭賜墓田易名端愍一時輦下士大夫高君孝行爭折節與訂交余之獲交于君亦自此始君既歸杜門奉母手父遺書且讀且泣所與游者

同里張命士鷄澤殷伯巖仲泓兄弟伯巖仕為
令君遺詩以耦耕招之伯巖隨棄官還君自髻
亂即嗜為詩吐納百氏不名一家而音節頓挫
沉鬱激昂一以少陵為師其所以師少陵者悲
愉吽嘯無一曲肖而非世俗掇拾字句以求
形似者所可比也丙申後持襖被為山水之游
余寓書于君曰蘇門孫徵君今之程伯子也君
壤地相接盍一往質之君至百泉以弟子禮謁

徵君徵君瞿然改容劇談信宿君自是獲聞天
人性命之旨遂不復為詩比余侍養里居徵君
遺余書謂廣平天資明敏入道甚易行將易浣
花而蓮溪矣蓋君自謁蘇門以後所造駸駸日
上嘗語人曰主靜不如主敬敬自靜也又曰破
得利字方能入門破得驕字方能入道又論朱
陸異同謂朱由大路遲而穩陸由便徑捷而危
其見理明而趨嚮正如此君少時才氣迅發人

多畏避之晚年器宇嚴重規言而矩行如水之
有坊帛之有幅始而憚君者繼皆傾心折服卒
之前夕猶召友語至夜分晨興閱姚江集復詣
兩弟所極論省察克治之學會聞客至遽歸忽
一仆而逝康熙十六年六月六日也距生前明
萬歷四十七年十一月三十日年五十有九嗚
呼蘇門既沒續其傳者無人今君逝而吾道為
益孤矣余初聞君訃即為詩哭君深以哲人既

喪吾道未興為憾閱兩月而君弟孝廉觀仲太
史隨叔以君行畧謁銘于余余與君交誼之切
如此何忍不銘按狀君先世為晉之絳人明初
掖縣令庸始遷廣平八傳而至贈考功郎諱化
是為君祖贈考功生端愍公諱佳胤前明辛未
進士歷仕至太僕寺寺丞妣靳封安人君諱涵
光字孚孟一字和孟鳧盟其號也生而天資穎
異能文章年十五補邑庠生端愍公數歷中外

君侍養時為獨多既奉端慤諱遂絕意仕進以
母命浮沉博士弟子中非其志也歲庚子

詔舉孝行有司欲以君應君固辭有司不能奪辛丑
貢入成均君投牒儀部謝病歸戊申

詔旨訪用隱逸魏公貞庵雅意屬君君復上書力辭
魏公咨嗟而止君出處之際侃侃中程如此著
文四卷聽山詩八卷荆園小語說杜性習圖義
利說行于世嗚呼方端慤公之殉國也太夫人

垂白在堂仲叔兩孤幼未成立公從容蹈義
一語不及于私良以身後之事有君在耳惟君
孝友篤摯喪葬盡禮勗兩弟讀書取科第知名
于時而自以潔修粹行見端慙公于九原之下
是父是子天實陰相之以視彼仳仳藪藪倖生
苟祿之徒不一傳而聲華銷歇者豈直相徑庭
已哉君娶盧氏天啟甲子舉人愜胤女子二頤
頤皆君五十後所生頤聘侍御寧公爾講女女

二一適貢監生李奇瑗一字劉徵陽以某年某
月某日葬君某鄉某原銘曰溯源自姜別為申
繇晉宅洺鐘詰人嶽嶽端慙國蓋臣成仁取義
式後昆處士守道甘賤貧嘯歌白首堅松筠晚
節益涉濂洛津鑄顏者誰惟蘇門大節廩廩小
物勤道不絕物羞同塵世衰俗敝微言泯倚君
力柱狂瀾翻少微一昔星芒昏沒者已矣生沾
巾銘君墓石垂重淵千載不滅真氣存

副都統一等阿思哈哈番又一拖沙喇哈番巴
圖魯路公墓誌銘

國家自剏造大業以迄耆定中原所謂熊羆戮力
之臣載在史冊者不可勝指其功建名立而白
首令終者固已聲施不朽若身經數十戰卒授
命於疆圉鋒鏑之間自以獲死所而無憾豈不
尤可重歟副都統一等阿思哈哈番路公以康
熙十七年歿於洞庭九馬嘴之陣

詔予祭葬進世秩榮哀之禮悉備蓋公為

祖宗朝從龍舊臣能以盡瘁報國故

廟堂之上特加優卹以獎其忠嗚呼偉矣公姓納

喇氏諱路什滿洲人束髮從戎以驍勇自喜崇

德中大師入山東之兗州公在行間率先登城

拔之因

賜名巴圖魯授三等阿達哈哈番順治初元隨

王師入山海關擊流寇二十萬衆一敗之于一片石

再敗之于慶都以功進二等阿達哈哈番嗣流
寇潰遁而西廊延一路所至皆賊公偕副都統
阿公喇善邀擊綏德敗兵大破之又偕叅領舒
公里渾擊延安步賊七戰七克會賊一隻虎兵
犯陣公徒步提戈急刺復大破之九公山之後
偵知李自成賊壘所在偕肅章京蘇公拜進薄
其營擊走偽劉侯獲自成妻子自成由此窮蹙
走死于時張獻忠據蜀久不下公奉

命隨王師入川親擊對敵兵者二同衆軍合擊賊兵者
三或以騎卒或以步軍所向無不摧敗順治十
六年

大師征滇黔公之功在十萬崎山者獨多偽總兵
羅大順等樹柵列鎗砲分兵拒戰多者三萬餘
少或萬餘或五千餘人公偕蘧章京鄂公訥副
都統噶公褚哈鼓衆迎擊連破數營敵大潰順
治十七年彙叙功績公先以

覃恩歷一等阿達哈哈番進三等阿思哈哈番至是以累功進二等阿思哈哈番康熙初年已六十用老成宿望同學士雷公虎至廣東察濱海地定界而還是時遭時承平謂不復有事兵革逮十三年三逆煽亂禁旅四征不庭公喟然歎

曰

王師在野其以我為識塗老馬可乎遂隨貝勒師入楚十七年秋以偏師取湘陰至洞庭湖之九馬

嘴風大作倉卒避風于綠林灘舟膠賊兵突出
以鳥鎗環擊舟盡碎公猶奮勇發矢石擊殺賊
十數人力竭被傷而卒七月二十八日事也康
熙二十五年追錄死事進一等阿思哈哈番又
一拖沙喇哈番世襲不替公老于兵間遇勁敵
大戰二十有餘合無失利者乃一旦身入于坎
窞如此論者深惜公以名將戰歿而又謂公志
在滅賊正如漢新息侯壺頭之困適遂其馬革

裏屍還葬之素願而不必為公悲也嗚呼

國家有軍旅之事而盡得如公者不以死生利害
易慮何寇賊之不殄哉公之卒距生庚戌歲得
年六十有九塋以康熙二十二年某月日元配
某氏繼配覺羅氏喀喇氏贈封俱夫人子二人
長布納海襲世秩由一等侍衛官協領覺羅夫
人出次偏武三等侍衛喀喇夫人出孫郎圖泰
必圖盧海布納海出納善納禪偏武出偏君雅

嗜文學素未與予交一日踵門折節屬為文勒
公墓石至懇且懇余愧不能揚公之風烈而重
違偏君之意不敢辭也因件繫公功績而系之
以銘曰掾甲登陴公之職克敵死綏公之志愍
綸追卹

當宁恩大書特書青史事少壯戎行經白首追奔逐
北萬餘里湘濱忽殞英雄悲波沸長疑怒決皆
穹隆

賜塚高祈連雙卧麒麟安且止金書鐵券貽爾嗣忠
臣有後永帶礪

右春坊右庶子公亮尹君墓誌

國家設立太學萃滿洲英雋之士比德藝而教之
三十年於茲矣漢士子分科入仕由國學進用
者十之二三而已滿洲人才蔚起當開制科時
間一就試于有司其他自公卿世胄以及白屋
寒畯未有不入太學而得奮跡為士大夫者今

屈指三事大僚偉然負當代名臣碩輔之望其
筮仕皆自國子生始則官祭酒司業者陶育八
旗之人才以備國家異日任使之用其責不綦
重矣乎余承乏西廂僅三月時滿司業為公亮
尹公竊覩公遇事警敏課督有程六館官胥咸
共奉其條教兩祭酒亦折節委聽焉蓋公自官
國雍歷十餘載凡規制之沿革禮教之廢興士
習之良窳材質之高下熟識於胸中如數黑白

故久而益勤其職前後為是官者未有能及公之盛者也公諱某公亮其字也世為滿洲人性嗜學研精經史丙夜不輟以文學知名于時順治八年由國子生擢內秘書院檢討晉編修未幾從和碩敬謹親王軍赴湖南緣事罷職十一年補內院七品筆帖式哈番十二年復以譯文註誤罷職閱數月補內官監七品筆帖式旋升他赤哈哈番十三年罷內官監十五年補吏部

考功司他赤哈哈番康熙元年晉考功司主事
時故總河都御史王公光裕為御史奉命察浙
江海道公偕行分察寧波一路寬嚴得宜至今
人爭述之六年晉司業八年

車駕幸太學參考故事修橫經坐講之禮公講尚書
堯典首節音吐琅琅左右皆竦聽閱日以大典
成

賜衣一襲功令八旗官學諸生業成者歲咨吏部以

次試職公力絕請寄一以才藝學行為衡品隲
嚴核凡所獎拔皆得人公之教寬和樂易諸生
有所陳說務使盡其意不合者以理抑之無疾
言忤色故人皆愧服十七年升右春坊庶子復
與余為同官時校譯講義公脫藁至再既疾猶
不釋手蓋公歷官精勤所至侃侃稱職如此而
聲跡顯著尤在為司業時故余述之為詳公天
性澹泊衣食無華侈喜賙人急宗族交游有

貧不能自振者輒捐貲為之助比及公歿三黨
之人撫棺而哭者莫不盡哀公生于某年某月
某日卒于康熙十九年某月某日某時享年若
干父某贈某母某氏繼母某氏俱誥封恭人公
事繼母盡孝中外無間言娶他他喇氏佐領額
公特禮女誥封淑人子二人長某娶內閣學士
兼禮部侍郎薩公海女繼娶刑部郎中希公福
女俱勅贈孺人又娶某氏長史佐領鄂公洛女次

幼女三人長適戶部筆帖式加一級南璽次適
吏部文選司郎中佐領陶羅次適三等侍衛薩
爾詹

勅授文林郎翰林院檢討申君墓誌銘

嗚呼余今日執筆而銘隨叔之墓此歐陽子所
謂惟聲與淚獨出余臆者也隨叔長於余四歲
方順治庚子隨叔初舉孝廉從其伯兄鳧盟寓
居京師時則今徐宮贊健庵盛禮部珍示為人

文領袖召集四方知名士讌飲城西館舍得十
有九人鳧盟最長余與隨叔最少酒半計孝廉
甫草議論蠡起談諧間作隨叔毅然以莊語折
之而罷隨叔與人交踈中介氣不隨俗俛仰自
應制舉時已然余一見即心嚮其為人此余與
隨叔定交之始也明年辛丑同舉進士又同與
館選相得益懽越一載隨叔丁母靳太安人艱
去及服除授檢討又與余同入史局預修

兩朝實錄晨夕不間者六年余伯兄禮存以春秋舉丁未進士實出隨叔之門余不敢復以輩行遇隨叔而隨叔之遇余如故也康熙十一年

實錄成各

賜白金表裏加俸一級隨叔旋引疾歸歸十餘年每書問至必稱疾今年春余有扈從之役遇隨叔仲兄孝廉觀仲于道倉卒片語謂隨叔病甚劇此余還自留都而隨叔之訃已聞於京師數月

矣冬十一月觀仲屬其甥庶常路子庭彥持狀
謁余謂日月有期乞誌其墓嗚呼誌隨叔者莫
余宜也不敢辭隨叔諱涵盼姓申氏申之先居
山西之絳自掖縣令某始遷于平干九傳為端
愍公諱佳胤前明崇禎辛未進士仕至太僕寺
少卿生三子隨叔其季也生有異質動止莊栗
寡嬉戲幼隨端愍公在官舍口授之書輒成誦
端愍既殉國難梟盟觀仲屏居隱約隨叔九歲

方入塾而讀書明敏數年即穿穴五經為文蒼
莽灝汗有先民大家之風既登第海內士子誦
其文奉為金科玉條至今不廢詩承鳧盟指授
以少陵為宗而馳騁於近代空同大復諸家雖
時出俊語絕無纖靡妍麗之態間仿李西涯樂
府為詠史詩百餘首奇變激宕具有史法可與
西涯並驅假歸後詩益工雅自矜慎故流傳者
絕少在史館時即奮志讀史以職務間之未果

里居多暇自署程課閱三歲而二十一史畢擇
其中忠孝節烈有關世教者薈萃成編而斷以
己意曰通鑑評語他若時代之盛衰政治之理
亂人才之消長議論之得失又別彙為一集平
居落穆少言笑及與人辨論古今抵掌數千年
事如在目前聽者皆驚伏而退其所為碑版記
序之文高古疎豁歸於簡潔嘗曰文尚體要一
泛濫則河漢無極矣其學古有得持議謹嚴如

此頃者史局肇開英雋輻輳隨叔淹雅博洽在
晉胥臣楚倚相之間而又深得班范歐陽為文
之法使之裁量是非斟酌進退則勝國一代之
史可以速就隨叔之不得與於勝國之史也豈
非史事之不幸耶故學士喇文敏公為院長一
日入奏屈指詞林人物舉隨叔姓名以對文敏
不輕許可昔同修

國史知隨叔深故奏對及之隨叔勞動在

國史其得疾亦在史館時為多初

章廟實錄分月編次出于衆手首尾多銜決余助隨叔
次第讐校芟汰繁複補葺闕遺凡兩易藁始免
前後錯迕之患如是者三載每散直常至日晡
脫藁未幾會有

旨重修

文廟實錄悉力鉤纂又復歲餘而其勞益甚隨叔與余
素羸弱當是時年壯氣銳勇於職業寒暑飢渴

一不以介意疾病伏於中不暇顧也今余苟幸
無恙而精力向衰視十五年以前不逮遠甚隨
叔纏綿抱疴時作時止卒至不起或者見隨叔
喜賓客嗜酒劇談夜分不輟謂失養生之宜
而病所由召實不繫此夫壯者有時而衰衰
者有時而老雖養生家不能免獨以國家有
用之才當未衰之年費志早沒使當世不獲
見其實用此余所不能不重悼惜於斯人者

也隨叔生于前明崇禎十一年九月其卒以康熙二十一年正月晦日年四十有五所著有西齋詩文集若干卷評語二卷廣平府志二十卷元配張氏贈孺人繼配鄭氏封孺人子三人顥預頡皆諸生力學有文顥娶秦氏進士秦君璟女繼娶張氏李氏預娶楊氏廣西按察使楊君峻女頡娶冀氏工部尚書冀公如錫女女四人長適冀公長男廩生植次許聘奉化知縣張君

奎昇男允元次許聘監察御史寧公爾講男倬
次幼俱鄭孺人出孫男一居郢預出孫女二顯
出者一預出者一銘曰喬松我我頤萎隰阿干
將鏐鏐弗試盤錯吁嗟哲人哀通履淳塵璫朱
紫肴核

圖史忠臣有孤宜昌厥家華星若揭宵露中折孝
友為畚十世用勦銘石幽竈永貽後裔

張文貞集卷十一